



Cumün da Scuol

Dal cussagl cumünal

In sias ultimas sezzüdas ha il cussagl cumünal trattà surtuot las seguintas fatschendas:

Fanestrìgls in chasa cumünala

A partir dals 1. december 2008 sun tuot ils fanestrìgls in chasa cumünala averts mincha gövgia fin las 19.00h.

Persunas chi lavuran tuottadi han suvent fadia da chattar il temp per gnir in chasa cumünala d'ürant las uras d'avertüra ufficialas. Tscherts cumüns tegnan perquai avert plü lönch ils fanestrìgls üna jada l'eivna. Eir il cumün da Scuol less uossa spordscher quist servezzan.

D'ürant ün temp da prouva laina eruir scha quista prolungaziun correspuonda ad ün bsögn da la populaziun. Scha quai es il cas vain'la introdüta definitivmaing.

Cumischiuns cumünalas

Las persunas elettas als 24 avuost ed als 7 settember 2008 pel cussagl cumünal, il cussagl da scoula, la cumischiun sindicatoria e la cumischiun EE aintran in uffizi als 1. schner 2009. Ultra da quels gremis saja eir cumischiuns cumünalas chi vegnan tschernüdas dal cussagl cumünal. Eir per quellas cumainza in schner il nouv trienni 2009 fin 2011. I's tratta da las seguintas cumischiuns:

- Cumischiun da fabrica
- Cumischiun da finanzas e d'economia
- Cumischiun da fö
- Cumischiun "Giuventüna fin 16"
- Cumischiun d'immundizchas
- Cumischiun da sunteri
- Stab da crisa

Ils commembers actuals da quistas cumischiuns vegnan dumandats prosmamaing sch'els vöglian darcheu candidar per lur post. Persunas chi vessan interess da dvantar nouv commember/commembra d'ün da quists gremis pon s'annunzchar fin als 12-12-08 pro la cancellaria cumünala chi dà eir infuormaziuns davart las incumbenzas da las differentas cumischiuns.

Restorant Trü

Ils fittadins da fin qua dal restorant Trü han desdit il contrat sülla fin d'october 2008. Marco Fontana chi maina fingià la disco "Sounds" surpiglia eir il restorant, intant fin la fin da la stagiun d'inviern 2008/09. Il BES chi maina pel cumün la gestiun da Trü ha suot-tascriet il contrat da fittanza correspondent. Davart dal cumün vegn intunà amo üna jada cun insistenza cha tuot las masüras davart dal fittadin per pisserar per uorden e quietezza i'ls cuntuoorns da la disco e dal restorant sajan ourdvarit importantas.

Taxas da cumpensaziun per prümas abitaziuns

Il cussagl ha decis da müdar il reglamaint davart la taxa da cumpensaziun per prümas abitaziuns. Per abitaziuns chi vegnan fabricadas in connex cun ün proget cumplessiv per ün hotel (fabricat nouv o müdamaints / ingrondimaints considerabels) as stoja bain-schi pajar la taxa da cumpensaziun sün ün conto special pro'l cumün. Quists mezs des-san però esser reservats be per güdar a financiar il proget d'hotel chi fa part dal proget cumplessiv. Ils mezs vegnan perquai dats libers pür cur cha l'hotel vain propcha realisà. Cun quista masüra ha il cussagl s-chaffi ün'ulteriura pussibilità per promover l'hotellaria tradiziunala a Scuol. Profitar da quista masüra pon progets d'hotel cumbinats cun abitaziuns illas differentas zonas da fabrica dal cumün.

Taxas d'attach per aua e chnalisaziun

Üna cumischiun es landervia da reveder il reglamaint davart las auas e la chnalisaziun. Tenor il reglamaint in vigur vain fixada la taxa d'attach pro fabricats novs resp. ingron-dimaints a man dals cuosts da fabrica, independent dal consüm. Quist möd da calculaziun nu correspuonda al princip dal chaschunader, siond chi dà hozindi fabricats chi cuostan fich blier, chaschunan però ün consüm d'aua minimal (sco p.ex. gronds parkegis suotterrans). Il nouv reglamaint resguarda quist fat e fixa las taxas da maniera plü disfe-renzchada.

Promoziun dals sports da naiv

L'inviern passà ha il cumün, insembel cullas pendicularas, fat ün'acziun per promover ils sports da naiv. Tuot ils uffants ill'età da scoula han pudü retrar ün abunamaint da stagiun per ün predsch fich favuraivel. Cun quist'acziun chi'd es statta fich bainvissa vain continuà eir quist inviern.

Sarinera S-charl

A la radunanza cumünala dals 27-10-08 ha preschantà e valütà ün rapreschantant da la cumischiun da privel dal Chantun las 6 variantas in discussiun pel lö da la sarinera. Il cussagl decida da s'inscuntrar sco prossem culs possessuors da stabilimaints da S-charl e discuter quellas variantas chi vegnan amo in dumonda. Là dess eir gnir preschantada la finanziaziun in detagl. In seguit decida il cussagl cumünal che varianta chi dess gnir perseguitada inavant.

Ils cuosts pella sarinera sco tala, quantifichats oriundamaing cun ca. 500'000 francs, s'amuntan in basa ad üna calculaziun tenor offertas a bundant 700'000 francs. Las ulteriuras lavuors, las masüras da sgürezza e'l chanal da colliaziun cuostan tanter 223'000 e 576'000 francs, tuot tenor il lö chi vain tschernü.

Fabricats dadour la zona da fabrica

L'uffizi chantunal pel svilup dal territori (ARE) ha rendü attent als cumüns, per incumbenza da l'uffizi federal correspondent, a la problematica da fabricats dadour la zona da fabrica realisats sainza il permiss chantunal necessari. Il cussagl incumbenzescha la cumischiun da fabrica da metter insembel ün inventar dals fabricats – privats e publics – realisats daspö l'on 1969, per esser sgür cha tuots sajan legalisats eir dal Chantun.

Concept parkegi e zona d'inscunter Stradun

Pel Stradun, tanter il Center Augustin e'l @-Center, es prevista üna zona d'inscunter cun üna sveltezza limitada da 20 km/h. In quist connex ston gnir levadas diversas piazzas da parcar. L'incumbenza d'elavurar ün concept per quista zona dess gnir surdatta al büro Hartmann & Sauter da Cuaira.

Dumondas da fabrica

Il cussagl resp. la direcziun han dat ils seguaints permiss da fabrica:

- a l'Administraziun federala da duana per ün'antenna da comunicaziun sü Motta Naluns (resalv l'acconsentimaint da l'Uffizi chantunal pel svilup dal territori per fabricats dadour la zona da fabrica e quel dals vaschins)
- a l'Energia Engiadina per ün transfuormatur pel quartier Rachögna-Senda sün parcella 960 in Rachögna
- a las Pendicularas Motta Naluns SA per müdamaints interns da la Chasa Alpina ed üna lucarna süll'ala dal tet vers ost
- a la Selecta AG per plazzar ün automat per bavrondas na alcoholicas e "snacks" sü l'areal da la Garascha Denoth
- a Flurin Denoth per transfuormar ün local da sia garascha in üna butia
- a l'uffizi chantunal da construcziun bassa per ün annex (suost per material) vi dal stabilimaint in Plattas
- a Bruno Brühwiler per üna chasa da vacanzas cun plüssas abitaziuns sün parc. 1061 (Schinnas) sco eir per üna tabla da vendita
- a Ruth e Philipp Gunzinger-Kirchen per sondas geotermicas sün parcella 2133 in Tof
- a Walter Casura per transfuormar ils locals da büro giò'l planterrain da la chasa dals iertavels Paper Denoth in üna butia da vestimainta
- a divers patruns da fabrica per müdamaints da progets fingià sancziunats sco eir per lavuors da renovaziun/müdamaints interns.